

# Epeses adi letama

## *Pol na waikaiwama*

<sup>1</sup> Taugu Pol Mamaitua na ġoane da Yesu Keriso na apasolma. Taugu uma letanama yà girugirumina taumi tauwai sumāga aitaugā Epesesma ko miamiana ġaromie. Taugu è kataie da taumi patupatutumima Yesu Kerisoe.

<sup>2</sup> Taugu aubaimima yà moimoiragina da Tamadama Mamaitua be Bada Yesu Keriso suba ta utemi be mate adi raunuatoima ġaromie e kenana.

## *Mamaitua waiaiaina Kerisoe e uteutedana*

<sup>3</sup> Tauda Mamaitua isanama tà kaisuġuna. Vutuna dà Badama Yesu Keriso Tamanama. Tauda naumeki da isanama tà kaisuġuna, baninama Mamaitua Arue mara waiaiaininama matabudi e uteutedana, baninama tauda Kerisoe aubainama. Nama tauna e voivoiana, baninama aruidama anisagunama aubainama. <sup>4</sup> Boni muriġa da Mamaitua dobu matabuna ya voienna, wainuapägoe ya vine dokedana da tauda sibo Mamaitua matane banaga viviviredama be nam aba wawunama te kiroġi. <sup>5</sup> Tauna boni ya vineda be tauna na ogama ya taragħna da Yesu Kerisoe tokare ei kawa natunedha be natunatunama tà tubuġħana. Inam vutuna tauna na wainuaverema be na ġoanama dosinama.

<sup>6</sup> Vutuna aubainama Mamaitua isanama tà kaisuġusūġuna na raukiviverema tauda ġarode

aubainama. Baninama Mamaitua Natunama Yesu nuanama taupaǵonama, be tauda Yesu āgaroǵaronama. <sup>7</sup> Be Yesu ya gurigurina, kosi-nine tauda ya kuvesidana be dà gewagewama ya noǵota poredina. Baninama Mamaitua na raukiviverema ya moraba kauana aubainama. <sup>8</sup> Mamaitua na raukiviveree tauna nuauyauya be waikatakatai ya ġini pore vavasaǵena tauda āgarode da tauda sibo tè kataie da tauna aba āgarode e voivoiena.

<sup>9-10</sup> Mamaitua na noǵotama semosemonama yai maǵataridina tauda āgarode, baninama nama tauna na āgoanama. Be na noǵotama semose-monama inam umanama: Raǵankaua e tava-na raǵanine, tauna tokare yaba matabuna marae be dobue Keriso na waibadama dibune e rawateǵeidina. <sup>11</sup> Tauna bonideǵo na ogama ya taraǵi be ya vinedana, da tauda Yesu Kerisoe Mamaitua na banagama. Nama tauna na āgoanama. <sup>12</sup> Vutuna aubainama tauda aitaugá Keriso tewai sumága dokena, tauda sibo isanama tè kaisuǵusuǵuna, na borumama matabuna aubainama. <sup>13</sup> Be yodi taumi riukaua varinama koya vaiena da Mamaitua tokare taumi ei yawasanima. Be taumi Keriso koyawai sumágena raǵanine, tauna Arua Babau boni ya sausaugena ya utemina, inam na ġipima. <sup>14</sup> Be uma Arua Babaune tauda ya borutawadana da tokare na buderima tà paǵona. Be yodi tauda tài rabana, naumeki da Mamaitua tokare e nawedana marae, be dabudine tauna mate tà mia nonoǵana. Vutuna aubainama tauda isanama tà kaisuǵusuǵuna.

*Pol ya moiragina Epeses banegidima  
aubaidima*

<sup>15-16</sup> Taugu è vaiemi da taumi Bada Yesu kowai sumāge be Mamaitua na damma kowai nuapaǵoedina. Vutuna aubainama taugu raǵan patapatanama Mamaitua yàwai kaiwena, be yà moimoiragina taumi aubaimima. <sup>17</sup> Be taugu yaǵoro yà moimoiragina da Mamaitua nuauyauya be katai sibo ya utemi da taumi Mamaitua sibo koya katai kauena. Tauna vutuna dà Badama Yesu Keriso na Mamaituama be Tamanama boruboruminama. <sup>18</sup> Be mate taugu yà moimoiragina da taumi nopomima Mamaitua sibo ya rawayanana. Yodibe taumi sibo koya katai kauena da aitaugá Mamaitua ya vinevinedina, taudi tokare yawasana vere vavasaǵinama ta banavina. Be mate taumi sibo koya katai kauena da Mamaitua na buderima boruboruminama, inam yaba dosi vavasaǵinama. Inam vutuna tauna na banagama tokare e utedina.

<sup>19</sup> Be mate taugu yà moimoiragina da taumi na rewapanama dosinama sibo koya katai kauena. Inam vutuna tauda tauwai sumāga ya utedana. <sup>20</sup> Uma rewapanine Mamaitua Yesu Keriso ya kawa midisúǵu munaǵe, be marae Mamaitua na kaba miane kasaunama yauwanine yai mienina. <sup>21</sup> Be tauna yodi guyaguyau isa naǵonaǵodima be waibabada dosidima adi rewapanama, be rewapaná ǵesaudima dobue be gunume, matabudi ya saǵa poredina, yodi raǵandie be raǵan ta veraverauna ta tavana. <sup>22</sup> Be Mamaitua yaba matabudi Keriso na waibadama dibune ya biridi be ya voie da Yesu ekalesia matabuna ewai

badedina. <sup>23</sup> Baninama ekalesia matabuna inam Keriso tubuginama, vutuna aubainama Keriso tauna gunuma, dobu, ekalesia, be yaba matabudi nopolima ya moğavuna.

## 2

### *Tauda Kerisoe tà yawayawasanana*

<sup>1</sup> Boni taumi ami rawağaiğai be ami gewagewama aubainama taumi arue koya gurina. <sup>2</sup> Inam rağandie taumi dobu aruidima gewegewedima adi badama Seitan koyawai muriwatanena. Inam aruinama teneğinama yodi banaga rawarawağaiğaidima ewai badedina. Be tauna vutuna wairewapaninama gunuma be dobu nopolidığa e babababarana nam tama kitikitana. <sup>3</sup> Noğone tauda matabuda nama Seitan tèwai muriwatane, be dà wainua noğonoğotama tè voivoiedi, be tubuğidama adi ġoane tè miamiana. Tauda boni gewagewa nophone tè tubuğana. Vutuna aubainama Mamaitua na medie tè miamiana. Inam kauinama teneğinama nama, yodi banaga rawarawağaiğaidima Mamaitua na medie ta miamiana.

<sup>4</sup> Be Mamaitua na raunuatoima dosinama aubainama tauna yai nuapağoeđana. <sup>5</sup> Tauda dà rawağaiğai be dà gewagewama aubaidima tauda arue tè gurina. Be Mamaitua Keriso mate yai yawasana tenağedana. Tauna ya kuvesidana na raukiviverema dosinama aubainama. <sup>6</sup> Tauda Yesu Keriso nophone. Vutuna aubainama Mamaitua tauda Keriso mate ya kawa midisuğu

tenaġeda be yodi tauda marae na kaba mi-anama boruborumine Keriso mate tà miamiana.  
<sup>7</sup> Mamaitua Yesu Kerisoe ewai nuapaġoedana. Vutuna aubainama uma kauine tauna na raunua-toie yaba veredima tauda ġarode e voivoiedina. Baninama tauna e ġoegħoena da tokare banaga matabudi tauna na raukiviverema dosima ta kitana.

<sup>8-9</sup> Raġanine taumi waisumaġa koyawai karena, Mamaitua na raukiviveree yai yawasanimina. Uma kauinama nam taumi ami noyama debane ko paġona, ibewa. Inam Mamaitua na puyoma taumi aubaimima. Vutuna aubainama taumi nam ko seġara yababa. <sup>10</sup> Mamaitua tauda ya voiedana. Tauda Yesu Kerisoe yai tubuġidana da sibo noya veredima tè voiedina. Inam noyed-imma veredima Mamaitua ya vokaukaua wain-onoġidina tauda aubaidama, da sibo tè voiedina.

### *Kerisoe tauda matabuda tenaġa*

<sup>11</sup> Taumi eteni banegimima uma ko noġoti. Taumi boni Jius banegidima awai isemina “Nam kopitom banegimi”, be taudi awai isa mu-naġedina “Kopitom banegidama”. Taudi kopitom a seġaseġara yababena. Be nopolimma kavakanama. <sup>12</sup> Ko noġoti da inam raġandie taumi madanie, nam Keriso diane. Taumi nam Mamaitua na damma Israel nopolie, ibewa, be mate taumi Mamaitua na saugama nam ko kataiedina. Taumi dobue nam Mamaitua ko kataiena, koya miamia nuababaġana. <sup>13</sup> Boni taumi madanie, nam Mamaitua diane. Be yodi Keriso kosinnejja, taumi ya verauġemina Mamaitua diane.

**14** Keriso ya voie da nopalama yai subana, vutuna aubainama tauda yodi dà banagama mate tà miamia kauana. Nogone tauma Jius banegimaima, be taumi eteni banegimima, tauda tèwai miataurina. Uma waimiataurinama inam maika gana. Inam gananama dam rabui ya dari-dariğedan. Be Keriso tubugine inam gananama ya katiweina. Inam kauine tauda dam rabui, be yodi ya rawategeidana da tauda inam dam tenağga. **15** Jius banegidima taudi tarawatu toitoi ġarodie, be Keriso na gurie uma tarawatudima adi waibadama yodi yai kovidina. Inam kauine boni tauda dam rabui, be yodi ya rawategeida be tauda dam tenağga, na subae tà miamiana. **16** Yesu Keriso korosie ya gurigurina raġħanina, tauda dam rabui tèwai miataurina ya kawa veredana. Tauna ya rawategeida da tauda yodi tubuġa tenağga. Boni tauda Mamaitua na ġaviamo, be yodi Keriso ya voie da tauda Mamaitua na banagama. **17** Keriso suba varinama verenama ya rauguguyena, taumi eteni banegimima ġavoe miemienimima ġaromie, be tauma Jius Mamaitua diane miemienimaima ġaromaie. **18** Be yodi tauda matabuda Arua Babau teneğine tokare tà verauna Tamadama ġorone, baninama aba Yesu Keriso aubaidama ya voienna aubainama.

**19** Vutuna aubainama eteni banegimima taumi yodi nam warri banaga, ibewa da taumi Mamaitua na damma, mara banegimima. **20** Taumi Mamaitua na tempolma, be Mamaitua apasol be peroveta adi noyama debedie ya keridana. Taudi tuatua maika. Be Yesu Keriso inam maika yeku, tuatua pakanama Mamaitua e ramara-

mana. <sup>21</sup> Taune tauwai sumāgā matabudi ya rawategei yağedāna da Mamaitua na tempolma ya tubuğāna. <sup>22</sup> Vutuna aubainama taumi eteni banegimima mate yodi nopomie Mamaitua na kaba miama, be Arue tauna taumi nopomie e miamiana.

### 3

#### *Pol tauna Mamaitua na ogama yawai mağataridina*

<sup>1</sup> Taugu Pol Keriso varinama è rarauguguyena ġaromie aubainama dibure a boruguna. <sup>2</sup> Taumi agunai koya kataiena da Mamaitua na raukiviveree taugu uma noyanama ya uteguna taumi sagumima aubainama. <sup>3</sup> Taugu uma letanama nōpone kaite è riuwai nonoġimina da Mamaitua na noġotama semosemodima ġarogue yai mağataridina. <sup>4</sup> Deġoda uma letanama ko sievina, taumi tokare ko kataie da riukaua taugu Keriso na noyama semosemonama è kataiena. <sup>5</sup> Uma kauinama boni kimta poredima nam ti kataiena, be yodi raġandie Mamaitua Arue yai mağatarina, na apasolma babaudima be na perovetama ġarodie.

<sup>6</sup> Keriso na noyama semosemonama inam umanama: Deġoda banaga vari verenama tai sumāgena, avedi da taudi Jius banegidi bo eteni banegidi, taudi tokare Mamaitua na buderima ta paġona. Jius be eteni banegidima taudi noġone dam rabui be yodi taudi Kerisoe tubuğā tenaġa be Mamaitua na waiaiainama ta paġona. <sup>7</sup> Mamaitua na raukiviveree, na rewapanama

ya uteguna da taugu vari verenama yà rarauguguyena.<sup>8</sup> Taugu avedi da banaga yababa Mamaitua na damma nopodie, be tauna ya vineguna da eteni banegidima ġarodie yà rauguguyana da taudi tokare Kerisoe, waiguyau ya moraba vavasaġana ta paġona.<sup>9</sup> Uma kauinama boni Mamaitua na ogama semosemonama. Be yodi tauna ya vineguna da banaga matabudi ġarodie Mamaitua na ogama matabudi yà giu waibatedina. Mamaitua tauna vutuna yaba matabuna tauvoiedima.

<sup>10</sup> Mamaitua e ġoegħoena da Jius be eteni banegidima e rawateġeidi, be ekalesia tenaġa e tubuġana. Yodibe guyaguyau be babada dosidima marae Mamaitua na nuauyauyama ta kita be ta kataien. <sup>11</sup> Uma inam tauna na ogama boni nama kenakenanama. Be yodi Mamaitua na ogama banidima, dà Badama Yesu Kerisoe ta tubutubuġana.

<sup>12</sup> Vutuna aubainama yodi Keriso tħawī sumaqena aubainama, tauda yodi teneteneġinama da Mamaitua ġarone ma raudebatorada tà naġona, be nam ma nairida. <sup>13</sup> Vutuna aubainama taumi nam sibo koyai nuaboyegu yau wainuatoitoima aubainama. Ibewa da taumi sibo koyai nuaverena, baninama taugu taumi aubaimima yàwai nuatoitoina.

### *Pol e moimoiragina Epeses banegidima aubaidima*

<sup>14</sup> Vutuna aubainama taugu raġan matabuna tuapikague è raupari be è moimoiragina Tamadama ġarone,<sup>15</sup> tauna vutuna yaba

matabuna marae be dobue ġarone yawasana tà paġopaġona. <sup>16</sup> Tamadama ġarone yaba veredima toitoi. Vutuna aubainama taugu yà moiragi be Tamadama yàwai baġana da tauna Aruine e voiemi da koi rewapanana. <sup>17</sup> Be yàwai baġana da Keriso ami waisumaġe nopomie e miana, dabudine ami waisumaġama ei rewapanana. Be mate yàwai baġana da ami wainuapaġoma e moraba gurata, be waramimima wainuapaġoe e yovo guratana maika kai waraminama doġa nōpone e yovoyovona nama. <sup>18</sup> Be mate yàwai baġana da taumi be Mamaitua na damma, matabumi Yesu na wainuapaġoma sibo koya katai kauena. Inam wainuapaġonama na morabama, be na dauma, be na saġa guratama, be na yovo guratama sibo koya katai kauena. <sup>19</sup> Tauda banaga tokare nam teneteneġina da Keriso na wainuapaġoma na morabama matabuna tà katai rovodi. Be taugu yà moimoiragina da taumi Keriso na wainuapaġoma ko katai kaue, be mayanama ko dami kauena. Yodibe taumi nōpomima Mamaitua na yawasanama be na rewapanama ei moġavuna.

<sup>20</sup> Mamaitua na rewapanama nōpode e noyanoyana. Vutuna aubainama aba da tài nu-anōgoñoġotena bo tài baġena, tauna tokare teneteneġinama e utedana. Be deġoda i ġoena, tauna tokare dosi yababinama ya utedana. <sup>21</sup> Yesu Kerisoe tauda tauwai sumaġa, Mamaitua isanama tà kaisuġusuġu nonoġena. Inam riukaua!

## 4

*Wairawategei Keriso tubugine*

<sup>1</sup> Taugu Pol Keriso varinama è rarau guguyena aubainama dibure yà miamiana. Vutuna aubainama yodi yà riuriu vavasağemina da koi beavaiegu. Ami yawasanama didimanidie ko miana, baninama Mamaitua ya vinemina aubainama, tauna na ġoane ko miana. <sup>2</sup> Taumi ko voyağota be ko mia nuetau. Be nam ami banagama ko nuamedi makaiedi, be wainuapağoe nuemima ko taibagina. <sup>3</sup> Rağan matabuna Arue koi rawateğeimi be subae ko mia tenağana.

<sup>4</sup> Baninama tauda matabuda inam tubuğä tenağä. Be Arua tenağä matabuda nopode e miamiana. Be dà gewagewama matabudi Mamaitua ya noğota poredina aubainama, matabuda dà noğotama tenağä, da inam rağanine tokare marae tà nağona. <sup>5</sup> Bada inam tenağä, be waisumağä inam tenağä, be babataito inam tenağä. <sup>6</sup> Be mate inam Mamaitua tenağä, matabuda Tamadama. Tauna vutuna matabuda ewai badedana, tauna vutuna matabuda nopode, be taude tauna na noyama e voivoiedina. <sup>7</sup> Be tauda tenatenağäga Keriso na ġoanama ruvane Mamaitua Arua puyonama ya utedana. <sup>8</sup> Baninama girugiruminama porane umanama e riuriuna:

“Tauna note ya sağä ya nağö guratana.

Be panipani banegidima toitoi mate yai doka nawedina.

Be na banagama puyo ya utedina.”

<sup>9</sup> Ko nōgoti da nōgone ya riuna, “Tauna note ya sāga ya nāgona”. Uma riunama ewai kataidana da tauna nōgone note be ya yovona dobue, dēgo tauda yodi tà miamiana. <sup>10</sup> Tauna vutuna ya yovoyovona, tenēginama ya sāga ya nāgo guratana mara matabudi muridie, be tauna yodi mara be dobu yai mōgavudina.

<sup>11</sup> Tauna vutuna ekalesia nopolie puyo tenate-nāgaga ya ute nawedina. Ğesaudima apasol, ġesaudima peroveta, ġesaudima taurauguguya, ġesaudima ekalesia taurabedima be ġesaudima tauwai katakatai. <sup>12</sup> Uma banegidima taudi adi noyama da tauwai sumāga ta sagudi, be tauwai sumāga Mamaitua na noyama ta voiedina. Be inam kauine Keriso na ekalesiama, vutuna tauna tubuġinama, ei rewapano be e morabana, <sup>13</sup> naumeki da tauda dà waisumāge tài rawatēgeida be Mamaitua Natunama tà katai kauena. Yodibe tauda tokare Kerisoe nuadama e pora be tauda dà yawasanama, Yesu na yawasanama maika ta tubuġana.

<sup>14</sup> Yodibe tauda dà waisumāge tài midi bagibagina, nam seda ġaūġaubodima maika. Be banaga kaikaiyovudima nam ta kaiyovueda be dà waisumāge ta kawa barabarada, waga rabama e rawarawa tagetagerina maika. <sup>15</sup> Ibewa da Mamaitua na riukauama wainuapāgoe tài muriwatanena. Dabudine tauda tokare Keriso tà miaratuna, tauna vutuna ekalesia debanama. Ekalesia inam Keriso tubuġinama. <sup>16</sup> Yesu Keriso na waibadae tubuġinama raganinama e rawatēgei yaġedina. Be raga tenatenāgaga adi noyama ya utedina da ta voiena. Inam kauine raga

tenatenaḡaḡa adi banagama mate tai kawa kaisagu be ta gogogogona. Be inam kauine Keriso tubuḡinama tokare wainuapaḡoe e yawasanana.

*Yanae ko miana*

<sup>17</sup> Bada isane taugu yà riuriuemina da nam eteni banegidima adi miane, ko mia. Taudi adi noḡotama barebaredima aubainama <sup>18</sup> nopolima tadiwanawana ya moḡavuna. Vutuna aubainama taudi nam Mamaitua na yawasanama diane, ibewa, be taudi a bua be a kawa nopolabobadodina. <sup>19</sup> Taudi nam vere bo gewagewa tima siesievina. Taudi gewagewa adi yawasanama matabudi ewai badedina. Taudi adi yawasanae badara dobido bi ta ḡoeg̊oena.

<sup>20</sup> Be taumi waisumaḡa koyawai karena raḡanine, taumi koya kataiena da Keriso inam yabedima gewegewedima nam ima ḡoeg̊oedina. <sup>21</sup> Taumi koya vaiena da Yesu varinama matabuna inam riukaua. <sup>22</sup> Vutuna aubainama taumi ami yawasanama poredima gewegewedima matabudi koya gosaḡana. Inam yawasanidima a gewagewa vavasaḡana, vutuna aubainama a kawakawa gewegewemina. <sup>23</sup> Nopomima be ami noḡotama sibo Arue koya rawavaudina. <sup>24</sup> Taumi sibo yawasana vaunama koya kotena. Uma yawasaninama e voiemi da taumi riukaua babau be didimana banegimima ko tubuḡana, maika Mamaitua.

<sup>25</sup> Vutuna aubainama waikaikaiyovu ko gosaḡa be riukaue ami banagama ko riuedina, baninama Yesu Keriso tubuḡine, tauda matabuda tenaḡa. <sup>26</sup> Nam ami medima e voiemi da gewagewa ko

voie. Be ami medima nam nopomie e kena gurata da ravi e tava. <sup>27</sup> Nam Seitan na kaitetema ko boru.

<sup>28</sup> Taumi aitaūga taudanedanene, danene ko gose pore be nimemie ko noya gurata be yaba veredima ko voiedi da banaga waikaruwağewağedima ko sagudina. <sup>29</sup> Nam ġasi bo waisabona mudumie e dobi. Ibewa da ami banagama anitai nuaveredima aubainama, taumi sibo mudumie giu veredīga a dobido bina.

<sup>30</sup> Be nam Arua Babau ko voie da ei nuaboya. Baninama inam tauna Bada Yesu na ġipima ya boruna, da na kaba verauma rağanine, taumi tokare ei yawasanimina.

<sup>31</sup> Vutuna aubainama uma kauidima sibo koya gose poredina: nuağorāğora, keamedi, meditupo, kunura, waimena be waimiatauri. <sup>32</sup> Ami banagama ġarodie kivimima sibo ya verena, be nopomie raunuatoi sibo ya kenana, be ami banagama adi gewagewama sibo koya noğota poredina. Maika nema Mamaitua ami gewagewama Yesu Kerisoe ya noğota poredina nama.

## 5

<sup>1</sup> Taumi Mamaitua na sedama ewai nua-pağogmina. Vutuna aubainama taumi tauna maika sibo koya tubuğana. <sup>2</sup> Be wainuapağoe sibo koya miana maika Keriso yai nuapağoe da, be dà gewagewama aubainama ya gurina. Be Keriso ya gurigurina, inam tipa verenama Mamaitua ġarone ya voienna, tauda aubaidama.

<sup>3</sup> Ko kita kaua da nam banaga badabadaridima, bo gewagewa banegidi, bo waigogo banegidima

nopomie ta mia. Inam kauidima gewegewedima Mamaitua na damma ġarodie nam sibo a kena. <sup>4</sup> Be taumi nam sibo uma yabedima koya voiedi: waisabona, bua giudima, bo tarakori gewegewedie koya tarakori. Inam yabedima sibo avedi, be taumi sibo rāgan matabuna Mamaitua koyawai kaiwena. <sup>5</sup> Taumi uma kauinama ko katai kauena: banaga aitaugā badabadaridima, bo yawasana miremiredima tauvoiedima, bo waigogo banegidima, inam nama baneginama nam na gabuma Keriso be Mamaitua adi waiguyauma nopone ima kenakenana. Waigogo banegidima inam kokoitau tauraudunedima, baninama taudi uma dobunama purepuredima ta rarau dunedina. <sup>6</sup> Ko kita kaua da nam aitau giu kaikaiyovudie e boru waideġemi, baninama inam kauidie tokare Mamaitua na medima dosinama e yovona banaga rawarawaġaġaidima ġarodie. <sup>7</sup> Vutuna aubainama inam kauidie taudi mate nam koi popo. <sup>8</sup> Baninama taumi boni tadiwanawanae koya miamiana, be yodi taumi Bada na yanae ko miamiana, vutuna aubainama taumi naumeki da yana banegidima adi yawasanae nama sibo koya miana. <sup>9</sup> Be yana na votama inam vere, didimana be riukaua.

<sup>10</sup> Vutuna aubainama taumi sibo koya raurubu gurata da Bada na ġoanama yawasandima sibo koya katai kauedina. <sup>11</sup> Be tadiwanawana na kauama nam sibo koya voiedi. Inam yabedima nam banibiribiridi, be taumi sibo banaga koyai kataidi da inam yabedima, taudi yaba gewegewedima. <sup>12</sup> Inam

yabedima banaga rawarawaḡaiḡaidima semoe ta voivoiedina, be giuedima yai tunimayamayaḡa kauana. <sup>13</sup> Be raḡanine inam yabedima yanae ta maḡatarāna, tokare banaga matabudi ta kitedi be ta kataiedi da inam yabedima matabudi gewagewa. <sup>14</sup> Be raḡanine voia gewegewedima yanae ta maḡatarāna, inam raḡanine inam voiedima gewegewedima tokare tai kavena. Vutuna aubainama banaga umanama a riuna:

“Tam gurie kenakenamma  
kwa midisūgu  
be Keriso ei yanam.”

### *Arua na rewapanae ko miana*

<sup>15</sup> Be ami yawasanae ko kita kauemi da nema ko miamia bako. Nam banaga buebuedima maika ko mia, ibewa da nuauyauya banegidima adi miane ko miana. <sup>16</sup> Uma raḡaninama e kenakenana da Mamaitua na noyama ko voienna. Be yodi gewagewa raḡandima, vutuna aubainama ko kita kaua, da inam raḡandima veredima nam koi yakaredi. <sup>17</sup> Vutuna aubainama nam koi taukoakoa, avedi, be Bada na ḡoanama ko kataieno. <sup>18</sup> Nam ko tego bua be tegobuanama e voiemi da ami yawanama e kawa gewagewa. Ibewa da Arua Babau sibo nopomima ya moḡavuna, <sup>19</sup> be Bada riune be sare mate koi kawa duḡu vivira. Be mate sibo koyai gitā be Arua saredima sibo nuemima nopone koya riḡerīḡedina Bada ḡarone. <sup>20</sup> Raḡan matabuna Tamadama Mamaitua sibo koyai kaiwena yaba matabuna aubainama dà Badama Yesu Keriso isane.

*Tautaugōma be adi waiwaivima*

<sup>21</sup> Keriso vivirenama aubainama ami banagama ami banagama mate koi kawa vivira be ko voteyeteyedina. <sup>22</sup> Taumi waiwaivi ami tautaugōmama ko viviredi be ko voteyeteyedina, Bada Yesu ko vovo teyeteyena maika. <sup>23</sup> Baninama tauḡoma tauna vutuna waivi debanama. Uma kauinama tenēginama nama Keriso tauna ekalesia debanama. Be ekalesia tauna vutuna Keriso tubuḡinama. Be Keriso tauna vutuna ekalesia tauwai yawasaninama. <sup>24</sup> Vutuna aubainama taumi waiwaivi ami tautaugōmama ko viviredi, be ko voteyeteyedina, maika ekalesia Bada Yesu ta vovo teyeteyena nama.

<sup>25</sup> Taumi tautaugōma ami waiwaivima koi nuapaḡoedina, maika Keriso ekalesia yai nuapaḡoedi be, tauname na yawasanama yai uta munaḡena. <sup>26</sup> Mamaitua riune Yesu upae\* ekalesia ya koḡedi, be ya voiedi da tauna na banagama a tubuḡana. <sup>27</sup> Tauna nama ya voiana da ekalesia kitnama e vere vavasaḡana aubainama, nam mira, bo nam pire, bo nam aba gewagewa ḡesau ḡarodie e kena. Ibewa da taudi babau. <sup>28</sup> Inam kauinama tenēgine taumi tautaugōma sibo ami waiwaivima koyai nuapaḡoedina, maika nema taumi tubuḡimima nuenuemima e paḡopaḡona nama. Baninama deḡoda am waivima kwai nuapaḡoena, inam tamḡa kwawai nuapaḡo munaḡemna. <sup>29</sup> Nam aitau tenaḡa taunaḡa tubuḡinama ima tuatuaḡaiena. Ibewa da tauna tubuḡinama ewai kani

---

\* **5:26:** Uma upanama baninama inam waibabataito.

bagibagi be e raberabe kauena, maika Keriso ekalesia ġarone nama e voivoiana, <sup>30</sup> baninama tauda ekalesia inam Keriso tubuġinama.

<sup>31</sup> Vutuna aubainama girugiruminama porane umanama ya riuna: “Tauġoma tamanama be tinanama e gosedi be na waivima mate tai rawateġeidi da taudi rabui inam tubuġa tenaġa.”

<sup>32</sup> Inam giunama baninama ya moraba kauana. Baninama uma giunama ewai kataidana da tauda ekalesia be Keriso inam tubuġa tenaġa.

<sup>33</sup> Vutuna aubainama yà riuriu munaġemina: Taumi tautaugħoma sibo ami waiwaivima koyai nuapaġoedina, maika nema taumi tubuġimima nuemima e paġopaqona nama. Be waiwaivi taumi sibo ami tautaugħomama koya viviredina.

## 6

### *Seda be adi dosima*

<sup>1</sup> Seda taumi Keriso ġaroġaronama aubainama, ami dosima ko voteyeteyedina. Inam kaua verenama. <sup>2</sup> Girugiruminama porane umanama ya riuna, “Tamamma be tinamma kwa viviredina!” Inam riuvavasaġġine, Mamaitua sauga mate ya boru dokena. <sup>3</sup> Be sauga inam umanama, “Tam tokare uma dobune yaba matabuna ġarone am yawasanae e verena, be niura kai daudaunama kwa raukaisaġġna.”

<sup>4</sup> Be taumi tametamedima ami sedama nam ko voiedi da ko kawa nuaboyedi bo ko kawa nuamedimedidi. Ibewa da taumi kaua veredima ko voiedina Mamaitua matane be koi katakatai yaġđedi be Bada riune koi giunidina.

*Taunoya adi babadama sibo a viviredina*

<sup>5</sup> Taumi taunoya ami babadama uma dobune ko viviredi be ko voteyeteyedina, nuemima tabutabune maika nema Keriso ko vovo teyeteyena nama. <sup>6</sup> Taumi nam ami babadama anitai nuaveredima aubaidima ta kitekitemi be nōgonairidie ko noyanoya. Inam avedi, be taumi rāgan matabuna nuemima tabutabune ko noyanaya, Bada Yesu anitai nuaverenama aubainama. <sup>7</sup> Rāgan matabuna ma nuaverem noya ko voiena, baninama inam nam banaga ġoma aubainama koma noyanoyana, ibewa da inam Bada matane tauna aubainama ko noyanoyana. <sup>8</sup> Be ko nōgoti da Bada tokare banaga tenatenaġaġa na noyama ruvane maesa e utena, avedi da tam taunoya bo taunoya na badama.

<sup>9</sup> Be mate taumi babada ami taunoyama ko rabe kauedina, be nam ko riuwai nainairidi. Baninama taumi be taunoya, taumi matabumi ami Badama tenaġa, tauna vutuna marae e mi-amiana. Be tauna matane taumi matabumi inam tenegimima.

*Mamaitua iġara taragaidima ya uteutemina ko kotedina*

<sup>10</sup> Yodi yau giuma damonama inam, Bada na rewapanama dosine taumi koi rewapanana. <sup>11</sup> Mamaitua iġara taragaidima ya uteutemina matabudi ko kotedi, be ko midi da bagibagināġa, yodibe Seitan na kaiyovuma gewegewedima koi ġaviedina. <sup>12</sup> Tauda uma dobune nam banaga ġoma tamawai ġaviedina, ibewa. Tauda arua be penama gewegewedima miamia

moisiridima, vutudi tāwai ġaviedina. Taudi vutudi adi babadama, be rewapanā ġesaudimā mate uma dobunama waikupikupinama tawai badena, aubainama tāwai ġaviedina.

<sup>13</sup> Vutuna aubainama Mamaitua iġara taragaidima ya uteutemina, matabudi ko ragaudi da tunimie ta saġa rovona, yodibe gewagewa e tavatavana raġanine, taumi Seitan koi ġavienā. Inam raġanine taumi tokare nam ko beku, be yaġoro ko midina. <sup>14</sup> Vutuna aubainama ko midi da bagibaginaġa be riukaua ko paġo be bogemie koi boretaienā, be Mamaitua na didimanama ko paġo da nuakademima koi rauġaġarina. <sup>15</sup> Raġan matabuna ko vokaukauana vari verenema rauguguyenama aubainama. Be banaga sibo koya riuedi da Mamaitua na subae a miana. Uma vokaukauinama inam maika ami kaġasumama ko vovo kaukauedina, naġo aubainama. <sup>16</sup> Be mate waisumaġa ko paġo da ami guduma, aniwai rauġaġarimima aubainama. Inam gudune taumi tokare Seitan na keama menarageragetinama e veraveraua ko kati gabana. <sup>17</sup> Be ami yawasanama Bada ya uteutemina koi kunuboboe. Be Mamaitua riunama ko paġona, inam vutuna Arua Babau na iġarama kwatikwatinama. <sup>18</sup> Be raġan matabuna Arua Babau ko moiragina, be ami ġoanama na ruvae Mamaitua ġarone sagu koi baġena. Raġan matabuna koi neneġanana ami moiragie, tauwai sumaġa matabudi aubaidima.

<sup>19</sup> Be taugu mate aubaiguma ko moiragi da ma raudebatoragu vari verenama waimoisirinama ya rauguguyenā. <sup>20</sup> Taugu yodi a panigu da

dibure yà miamiana, be ko moiragina aubaiguma da taugu yaḡoro ma raudebatoragu vari vere-nama yà rauguguyena. Inam taugu yau noyama.

*Pol na waikaiwama*

<sup>21</sup> Taugu Taikikas è riuporena ḡaromie. Tauna banaga patupatutunama Bada matane, be mate nuaguma taupaḡonama. Taugu nema yà mi-amia bakona, tauna tokare yaba matabuna ei varimina. <sup>22</sup> Vutuna aubainama taugu è riuporena ḡaromie da nema yà miamia bakona sibo yai varimi da koya kataiena, be mate tauna e duḡumina.

<sup>23</sup> Taugu Tamadama Mamaitua be dà Badama Yesu Keriso yàwai baḡedinā da suba, wainuapaḡo be waisumaḡa sibo a utemina. <sup>24</sup> Be mate adi raukiviverema taumi aitauḡa Yesu Keriso kowai nuapaḡo nonoḡenā sibo a utemina. Uma yau giuma damonama.

**Vari Verenama  
The New Testament in the Dawawa Language of  
Papua New Guinea  
Nupela Testamen long tokples Dawawa long Niugini**  
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 11 Nov 2022 from source files dated 9 Oct 2020

9b8bda32-db42-5be3-9d24-4e4a5d5f65b2